

四庫全書

子部

欽定四庫全書

醫說卷四

勞瘵

五勞

宋 張杲 撰

夫人作勞傷於五臟五臟之氣因傷成病故謂之五勞
肺勞之狀短氣而面腫不聞香臭肝勞之狀面目乾黑
口苦精神不守恐畏不能獨卧目視不明心勞之狀忽

忽喜忘大便難或時澹利口内生瘡脾勞之狀舌根苦
直不得嚥唾腎勞之狀背難俯仰小便不利赤黃而有
餘瀝囊濕生瘡小腹裏急治法肝勞補心氣心勞補脾
氣脾勞補肺氣肺勞補腎氣腎勞補肝氣此療子以益
母也經曰聖人春夏養陽秋冬養陰以補其根本肝心
為陽脾肺腎為陰夫五臟實亦成勞虛則補之實則瀉
之

六極

六極者筋極主肝脉極主心肉極主脾氣極主肺骨極主腎精極主臟肺筋極之狀令人數轉筋十指指甲皆痛苦倦不能久立脉極之狀忽忽喜忘少顏色眉髮墮落肉極之狀飲食無味不生肌肉皮膚枯槁氣極之狀正氣少邪氣多氣不足多喘少言骨極之狀腰腎酸削齒痛手足煩痛不欲行動精極之狀肉虛少氣喜忘鬢衰落然謂之極者病重於勞也治法與治勞同

七傷

七傷者一曰大怒逆氣傷肝二曰憂愁思慮傷心三曰飲食大飽傷脾四曰形寒飲冷傷肺五曰久坐濕地傷腎六曰風雨寒濕傷形七曰大怒恐懼傷志肝傷則少血目暗心傷則苦驚喜忘脾傷則面黃善卧肺傷則短氣咳嗽腎傷則短氣腰痛厥逆下冷形傷則皮膚枯槁志傷則恍惚不樂治法與五勞六極同

虛勞

男子平人脉大為勞極虛亦為勞男子勞之為病其脉

浮大手足煩春夏劇秋冬差陰寒精自出痠削不能行
寸口脉浮遲浮則為虛遲則為勞虛則衛氣不足浮則
榮氣竭脉直者遲逆虛也脉澀無陽是腎少寸關澀無
血氣逆冷是大虛脉浮微緩而大者是勞也脉微濡相
搏為五勞微弱相搏虛損為七傷

冷勞

冷勞之人氣血枯竭表裏俱虛陰陽不和精氣散失則
内生寒冷也皆由臟腑久虛積冷之氣遂令宿食不消

心膈飽滿臍腹疼痛面色痿黃口舌生瘡大腸泄痢手足無力骨節酸疼久而不痊轉加羸瘦故曰冷勞

勞症

勞動作也郭逢原曰凡人暫爾疲倦通謂之勞而今人以勞為惡疾而惡聞之親戚朋友共為隱諱見其疾狀莫敢呼之殊不知勞之為病初起於動作不能節謹致於疲倦且傷不已漸成大疾凡言虛勞者五勞是也六極七傷為類蓋蒙莊所謂精太用則竭神太勞則弊者

治法不過補養五臟滋益氣血使之強盛則其疾自去
又有傳尸勞者則非此類蓋緣尸症及挾邪精鬼氣而
成者也經曰人有三虛逢年之虛遇月之空失時之和
乍感生死之氣忽犯鬼物之精大槩寒熱淋露沉沉默
默不的知其所苦而無處不惡積月累年漸就委頓既
死之後又復傳症他人者是也茲又須用通神明去惡
氣諸藥以治之經曰草木咸得其性鬼神無所遁情剗
射剗犀驅曳邪惡飛丹鍊石引納清和疑其為此疾而

設已上鷄
峰方

傳勞

葛洪云鬼症者是五屍之一症又挾諸鬼邪為害其病變動乃有三十六種至九十九種大略使人寒熱淋瀝沉沉默默不知所苦無處不惡累年積月漸就沉滯以至於死傳為旁人乃至滅門覺如是候者急治獺肝一具陰乾杵末服方寸匕日三未愈再作肘後云此方神良宣和間天慶觀一法師行考召極精嚴時一婦人

投狀述患人有祟所附須臾召至附語云非我為禍別
是一鬼亦因病人命衰為祟爾渠今已成形在人肺中
為蟲食其肺絲故令吐血聲嘶師掠之此蟲還有畏忌
否久而無語再掠之良久云容某說惟畏獼瓜屑為末
以酒服之則去矣患家如其言而得愈此予目所見也
究其患亦相似獼爪者殆獼肝之類歟

本事方

遇道人治傳勞方

袁州寄居武節郎李應本相州法司嘗以吏役事韓似

夫樞密兵火後忽於宜春見之云從岳侯軍得官今閒居於此從容問其家事潛然淚下曰某先有男女三人長子因議買宅入久空無人所居之室忽覺心動背寒凜凜遂成勞瘵之疾垂殆傳於次室女也長子既死女病尋亟繼又傳於第三子證候一同應大恐即禱於城隍神每日設麪飯以齋雲水異遇異人且許謝錢三十萬數日因往市中開元寺前有一人衣俗士服自稱貧道踵足而呼曰團練聞宅上苦傳尸勞貧道有一藥方奉

傳同入寺中間其姓名不答口授云云應即取筆書之
道人言欲過湖南應畱之飯云已喫飯了欲贈之錢云
自有盤纏臨行又言此藥以天靈蓋虎糞內骨為主切
須仔細尋覓青蛇腦如無亦可服藥前一日須盛享城
隍神求為陰助應曰既求之於神何必用藥道人曰不
然即揖別西去應以其事頗異敬如其言治藥既成設
五神位具飲饌十品如待賓客以享城隍又別列酒食
以犒飲陰兵仍於其家設使者一位於病榻之間服藥

食頃臟腑大下得蟲七枚色如紅燠肉而腹白長約一寸濶七八分前銳後方腹下近前有口身之四周有足若魚骨細如針尖而曲已死試取火焚之以鐵火筋割刺不能入病勢頓減後又服一劑得小蟲四枚自此遂安今已十年肌膚悅澤不復有疾道人後竟不來其藥用天靈蓋三錢酥炙黃色為末秤虎糞內骨一錢人骨為上獸骨次之殺虎大腸內取者亦可用同青蛇腦小豆許或菽豆許同酥塗炙色轉為度無蛇腦只酥炙亦

得鼈甲極大者醋炙黃色為末秤一兩九肋者妙安息
香半兩桃仁一分去皮尖研以上為末絹篩過檳榔一
分別為細末麝香一錢別研青蒿取近梢三四寸細剉
六兩豉三百粒蔥根二十一箇拍破東引桃柳李桑枝
各七莖麕如筋頭大各長七寸細剉楓葉二十一片如
無亦得童子小便半升右先將青蒿桃柳李桑枝楓葉
蔥豉以官省升量水三升煎至半升許去滓入安息香
天靈蓋虎糞內骨鼈甲桃仁與童子小便同煎取汁去

滓有四五合將檳榔麝香同研均調作一服早晨溫服
以被蓋覆出汗恐汗內有細蟲以帛子拭之即焚此帛
相次須瀉必有蟲下如未死以大火焚之並棄長流水
內所用藥切不得令病人知日後亦然十來日後氣體
復圓再進一服依前焚棄至無蟲而止此藥如病者未
亟可以取安如已亟俟其垂死則令下次已傳染者服
之先病者雖不可救後來者斷不傳染

出百一選方韓
樞密孫虛師亞

勞傷瘵疾

男子勞傷而得疾瘵漸見瘦瘠用童子小便二盞無灰酒一盞以新甕瓶貯之入全猪腰一對內密封泥日晚以慢火養熟至中夜止五更初更以火溫之發瓶飲酒食腰子病篤者只一月效平日瘦怯者亦可服此藥益以血養血全勝金石草木之藥也

瑣碎錄

勞復

故督郵頓子獻得病已差詣華佗視脉曰尚虛未復復

勿為勞事御內即死臨死當吐舌數寸其妻聞其病徐從百里外省之止宿交接中間三日病發一如佗言

志

鬼症

韶州南七十里曰古田有富家婦人陳氏抱異疾常日無他苦每遇微風吹拂則股間一點奇痒爬搔不停手已而舉體皆然逮於癸厥凡三日醒及坐有聲如歎其身乍前乍後若搖兀之狀率以百數甫少定又經日始

因卧不知人累夕愈至不敢出户更十醫弗效劉大用
視之曰吾得其証矣先與一服取念珠一串來病家莫
知何用也當婦人拙兀時記其疏數之節已覺微減然
後云是名鬼症因入神廟看為邪所憑致精彩蕩越法
當用死人枕煎湯飲之既飲大瀉數行宿病脫然大用
云枕用畢當送還元處如遲留使人顛狂益但借其氣

耳
編類

療疾

越州鏡湖邵長者女十八染瘵疾累年刺灸無不求治醫亦不效有漁人趙十煮鰻羹與食食覺內熱之病皆無矣今醫家所用鰻煎乃此意

尸症

飛尸者遊走皮膚穿臟腑每發刺痛變作無常遁尸者附骨入肉攻鑿血脉每發不可得近見尸聞喪哀哭便發風尸者淫濯四肢不知痛之所在每發昏沉得風雪便作沉尸者纏骨結臟衝心脇每發絞切遇寒冷便作

注尸者舉身沉重精神錯雜常覺昏廢每節氣致變輒成大惡皆宜用忍冬葉數斛煮取濃汁稠煎服之如鷄子大一枚日三太乙精神丹蘇合香丸治此病第一事

方

虛勞用藥

凡虛勞之疾皆緣情慾過度榮衛傷勞致百脉空虛五臟衰損邪氣乘襲致生百疾聖人必假藥石以資氣血密腠理以禦諸邪肌肉之虛猶如體之輕虛如馬勃通

草蒲梢燈心之屬是也。非滋潤粘膩之物以養之不能實也。故前古方中鹿角膠、阿膠、牛乳、鹿髓、羊肉、飴糖、酥酪、杏仁煎、酒蜜人參、當歸、地黃、門冬之類者，蓋出此意。本草云：補虛去弱。羊肉、人參之屬是也。所謂虛勞者，因勞役過甚而致虛損，故謂之虛勞。今人才見虛弱疾證，悉用燥熱之藥，如伏火、金石、附子、薑桂之類，致五臟焦枯，血氣乾涸而致危困，皆因此也。如虛而無冷者，止可於諸虛勞方中加諸溫熱藥為助可也。如此即不失古

人之意

醫餘

鰻治勞疾

有人多得勞疾相因染死者數人取病者於棺中釘之棄於水永絕傳染之患流之金山有人異之引岸開視見一女子猶活因取置漁舍多得鰻鱓魚食之病愈遂為漁人之女

稽神錄

虛勞服藥

養生必用方論虛勞不得用涼藥如柴胡鼈甲青蒿麥

門冬之類皆不用服唯服黃芪建中湯有十餘歲女子
因發熱咳嗽喘急小便少後來成腫疾用利水藥得愈
然虛羸之甚遂用黃芪建中湯日一服三十餘日遂愈
蓋人稟受不同虛勞小便白濁陰臟人服橘皮煎黃芪
建中湯獲愈者甚衆至於陽臟人不可用煖藥雖建中
湯不甚熱然有肉桂服之稍多亦反為害要之用藥亦
量其所稟審其冷熱而不可一槩以建中湯治虛勞也

謹之

醫餘

骨蒸內熱

睦州楊寺丞有女事鄭迪功苦有骨蒸內熱之病時發外寒寒過內熱附骨蒸盛之時四肢微瘦足跣踵者其病在五臟六腑之中衆醫不差因遇處州吳醫看曰請為治之只單用石膏散服後體微涼如故其方出外臺秘要只用石膏乳細十分似麵以新汲水和服方寸七取身無熱為度

名醫錄

氣血虛發厥熱

氣虛則發厥血虛則發熱厥者手足冷也氣屬陽陽虛則陰湊之故發厥血者陰也血虛則陽湊之故發熱也氣虛發厥者當用溫藥血虛發熱者不宜用涼藥當用溫養氣血之藥以補之宜養陰黃芪建中湯之類是也又有一種病實熱者極而手足厥冷所謂熱深厥亦深此當用涼藥須以脉別之也此最難辯差之毫厘則害

人性命戒之

醫餘

治羸疾

開元間明州人陳藏器撰草本拾遺云人肉治羸疾自此閭閻相效割股

治羸

仁和縣一吏早衰病瘠齒落不已從貨藥道人得一單方只碾生硫黃為細末實於豬臟中水煮臟爛碾細宿蒸餅圓如桐子大隨意服之兩月後飲啖倍常步履輕捷年過九十畧無老態執役如初因從邑宰入村醉食牛血遂洞下數十行所泄如金水自是厓悴少日而死

李巨源得其事於臨安入內醫官管範嘗與王樞使言之王云但聞豬肪脂能制硫黃茲用臟尤為有理亦合服之久當見效

類編

治勞瘵吐血

翦草狀如茜草又如細辛婺台二州皆有之惟婺可用其法每取一觔淨洗碎為末入生蜜一觔和成膏以陶器盛之不得犯鐵日一蒸不曝至九日乃止治勞瘵吐血損肺及血妄行名曰神傳膏令病人五更起面東坐

不得語言用匙抄藥如食粥然每服四匙良久呷稀粟米粥壓之藥只冷服粟飲亦不可太熱或吐或下皆無害如久病肺損咯血一服立愈

本事方

天靈蓋

謹按天靈蓋神農本經人部惟髮髮一物外餘皆出後世醫家或禁術之流奇性之論殊非仁人之用心世稱孫思邈有大功於世以殺命治命尚有陰責況於是也近數見醫家用以治傳尸勞未有一效者信本經不為

害也殘忍傷神又不急於取效苟有可易即易仁者宜
盡心焉苟不以是說為然決為庸人之所惑亂設云非
此不可是不得已則宜以年深塵泥所漬朽者為良以
其絕屍氣也

本草

鼻衄吐血

鼻衄

饒州士民李士哲苦鼻衄垂至危因醫授以方取蘿蔔
自然汁和無灰酒飲之則止醫云血隨氣運轉氣有滯

逆所以妄行蘿蔔最下氣而酒導之是以一服效經五
日復如前僅存喘息而張思順以明州刊王氏單方刮
人中白置新瓦上火逼乾以溫湯調服即時血止至今
十年不作張監潤之江口鎮適延陵鎮官曾棠入府
委至務同視海舶曾著白茸毛背子盛服濟潔正對談
之次血忽出如傾變所服為紅色駭曰素有此疾特不
過點滴耳今猛烈可畏覺頭空空然殆有性命之慮張
曰君勿憂我當漸治一藥移時而就持與之血亦止不

復作人中白者旋盆內積滿垢是也蓋秋石之類特不多用火力治藥勿使其人知恐其以穢濁不肯服此方可謂神矣

又

予在汝州時因出驗屍有保正趙溫者不詣尸所問之即云衄血已數斗昏困欲絕予使人扶掖以來鼻血如簷溜平日所記治衄數方旋合藥治之血勢猛皆衝出予謂治血者莫如地黃試遣人四散尋生地黃得十餘

勑不暇取汁因使生喫漸及三四勑又以其滓塞鼻須
臾血定又癸未歲予妹病吐血有醫者教取生地黃自
然汁煮服之日服數升三日而愈有一婢病經血半年不
通見釜中餘汁以為棄去可惜輒飲數杯尋即通利地
黃治血其功如此地黃但用新布拭淨搗汁勿用水洗
方信效

嘔血咯血

台州獄吏憫一大囚將死頗照顧之囚感語之吾七次

犯死罪盡力抗諱苦遭訊考坐是肺皆撈損至於歐血
適得一藥每用其效如神荷君庇拊之恩特此以報只
白芨一味米飲調爾其後凌遲僧者剖其胸見肺間竅
穴數十處皆白芨補填之色猶不變也洪貫之聞其說
為郢州長壽宰規之赴洋州任一卒忽苦咯血勢絕危
貫之用此救之一日即止

癸志

山梔子茅花愈衄血

蔡子渥傳云同官無錫監酒趙無疝兄衄血甚已死入

殮血尚未止一道人過門聞其家哭詢問其由道人云
是曾服丹或燒煉藥予有藥用之即活囊間出藥半錢
七吹入鼻中立止良久得活乃山梔子燒存性末之本方

又治鼻衄不止欲絕者取茅花一大把挫碎用水兩碗
煮一椀分二服飲立止良方

頭風

偏頭疼

裕陵傳王荊公偏頭疼方云是禁中秘方用生菜蕪汁一蜆殼仰卧注鼻中左痛注右右痛注左或兩鼻皆注亦可數十年患皆一注而愈荊公與僕言已愈數人矣

良方

頭眩

有人苦頭眩頭不得舉目不得視積年華佗使悉解衣倒懸令頭去地三寸濡布拭身體令周匝視諸脉盡出五色佗令弟子以鉞刀決脉五色血盡視赤血出乃下

以膏摩被覆汗出周匝飲以葶藶散而愈

三國志

蹶頭熱

菑川王病召臣意診脉曰蹶上為重頭痛身熱使人煩
懣臣意即以寒水拊其頭刺足陽明脉左右各三所痛旋
已病得之沐髮未乾而卧診如前所以蹶頭熱至肩

史記

婦人偏頭痛

有一婦人患偏頭痛一邊鼻塞不聞香臭常流清涕或
作臭氣一陣服遍治頭痛藥如芎藭皆不效人無識此

病者或曰腦癰偶有善醫云但服局方芩犀丸不十數服忽作嚏涕突出一鉗稠膿其疾遂愈

沐頭洗浴

沐頭不可用冷水必成頭風之疾浴罷不可和衫裙寢恐成外腎腫疼腰背拳曲

婦人月水來不可沐頭

婦人女子月事來不可洗頭或因感疾終身為痼病不

可治

泊宅編

川芎不可久服

一族子舊服芎藭醫鄭叔熊見之云芎藭不可久服多
令人暴死後族子果無疾而卒予姻家朝士張子通妻
因病腦風服芎藭甚久亦一旦暴亡予自見者

筆談

眼疾

目疾

凡人食五辛諸熱食飲刺頭出血過多極目遠視燈前
看字月下攻書不避煙火博奕經時飲酒不已熱飡麪

食抄寫多年雕縷繡畫泣淚過多房慾無節遠觀星火
視日目極瞻望山川皆是喪明之本可不謹哉

瑣碎錄

讀書損目

讀書之苦傷肝損目誠然晉范甯嘗苦目病就張湛求
方湛戲之曰古方宋陽子少得其術以授魯東門伯次
授左丘明遂世世相傳以及漢杜子夏晉左太冲凡此
諸賢並有目疾得此方云損讀書一減思慮二專內視
三簡外觀四旦起晚五早夜眠六凡六物熬以神火下

以氣篋蘊於胃中七日然後納諸方寸修之一時近能數其目睫遠視尺箠之餘長服不已洞見牆壁之外非但明目乃亦延年審如是而行之非可謂之嘲戲亦奇

方也

本事方

觀音洗眼偈

台州僧處瑫中年病目常持誦大悲咒夢觀音傳授法偈令每旦咒水七遍或四十九遍用以洗眼凡積年障翳近患赤目無不獲痊處瑫跪受而寤悉用記憶如說

誦行之不踰時平愈壽至八十八歲其偈曰救苦觀世
音施我大安樂賜我大方便滅我愚癡暗賢劫諸障礙
無明諸罪惡出我眼室中使我視物光我今說是偈洗
懺眼識罪普放淨光明願觀微妙相

戊志

眼疾不可洗浴

舊說眼疾不可浴浴則病甚至失明者承直郎白彥良
云未壯歲之前歲歲患赤眼一道人勸但能斷沐頭則
不復病此彥良自此不沐今七十餘更無眼病

泊宅編

眼痛不食

有人患赤眼腫痛脾胃虛弱喫飲食不得診其肝脉盛脾脉弱服涼藥以治肝則損脾愈喫飲食不得服煖藥以益脾則肝愈盛而加病何以治之但於溫平藥中倍加肉桂不得用茶調恐損脾也肉桂殺肝而益脾故一治而兩得之傳曰木得桂而死

醫餘

眼赤腫

有人患眼疾每睡起則眼赤腫良久却無事百方治之

無效師曰此血熱也非肝病也卧則血歸於肝熱血歸肝故令眼赤腫也良久便無事者人睡起血復散於四肢故也遂用生地黃汁浸粳米半升漚乾曝令透骨乾凡三浸三乾用麤瓶子煎湯一升令沸下地黃米四五匙煎成薄粥湯放溫食半飽後飲一兩盞即睡如此兩日遂愈生地黃汁涼血故也

同上

眼疾有虛實

凡眼疾有上盛下虛者有上虛下實者虛者宜服補腎

藥補其母也實者宜服涼心經藥瀉其子也眼科云所謂補藥者非硫黃附子鹿茸菴容之類是朱砂磁石之類也治眼而補下當用眼藥故也茲為至理

同上

赤目戒食

患赤目以熱水濯足若澡浴必致失明切不可食犬鷄魚鶩鴨卵

一目失明

錢鏐年老一目失明聞中朝國醫胡某者善醫上言求

之晉祖遣醫泛海而往醫視其目曰尚父可無療此當
延壽五七歲若決瘻去內障即復舊但慮損福耳鏐曰
吾得不為一目鬼於地下足矣願醫盡其術以療之當
厚報醫為治之復故鏐大喜厚賂醫金帛寶帶五萬緡
具舟送歸京師醫至鏐卒年八十一矣

劉穎叔
異苑

治眼

郭太尉真州人久患目盲有白翳膜遍喫眼藥無能效
者有親仲監稅在常州守官聞張龜龍之名因薦於太

尉請張公視之曰此眼太尉緣熱藥過多乃生外障視物不明朝朝昏黑更無所覩醫者皆為肝元損下虛補其肝腎眼愈盲甚張曰請太尉將藥點眼并服之一月取翳微消後果一月翳退雙目如舊因求點喫藥方乃只用猪膽微火銀鉋內煎成膏入冰腦粒如黍米大點入眼中微覺翳輕後又將猪膽白膜皮曝乾合作小繩如釵大小燒作灰待冷點翳盛者亦能治之此方甚好勿

妄傳

名醫錄

治內障

熟地黃麥門冬車前子相雜治內障眼有效屢試信然其法細搗蜜丸桐子大三藥皆難搗羅和合異常甘香

真竒方也

東坡大全篇

治爛緣眼

潭州宗室趙太尉家乳母苦爛緣風眼近二十年有賣藥老嫗過門云此眼有蟲其細如絲色赤而長久則滋生不已吾能談笑除之入山取藥晚下當為治療趙使

僕陰尾之見溫汾道掇叢蔓木葉以手按碎送口咀嚼而留汁滓於小竹筒內俄復還索皂紗蒙乳母眼取筆畫雙眸於紗上然後滴藥汁漬眼下緣轉盼間蟲從紗中出其數十七狀如先所云數日再至下緣肉乾如常人復用前法滴上緣又得蟲十數家人大喜後傳與醫者上官彥誠遍呼鄰側村婦病此者驗試無不立差其藥乃覆盆子葉一味著於本草陳藏器云治眼暗不見物冷淚浸淫不止及青盲等取此草日曝乾搗令極爛薄

綿裹之以男子所飲乳汁浸如人行八九里久用點目中即仰卧不過三四日視物如少年但禁酒麪油葷治

眼妙品也

癸志

治內障限

明州定海人徐道亨父沒奉母周游四方事之盡孝淳熙中到泰州宿於逆旅因患赤眼而食蟹遂成內障欲進路不能素解暗誦般若經出丐市里所得錢米仍持歸養凡歷五年忽夜夢一僧長眉大鼻托一鉢盂孟中

有水令徐掬以洗眼復告之曰汝此去當服羊肝丸百
日徐知為佛羅漢喜而拜願乞賜良方僧曰用淨洗夜
明砂一兩當歸一兩蟬殼一兩木賊去節一兩共碾為
末買羊肝四兩水煮爛搗如泥入前藥拌和丸桐子大
食後溫熟水下五十丸服之百日復舊與母還鄉母亡
棄家入道

治眼二百味花草膏

福州人病目兩眼間赤濕流淚或痛或痒晝不能視物

夜不可近燈光兀兀癡坐其友趙謙子春語之曰是為爛緣血風我有一藥正治此名曰二百味花草膏病者驚曰用藥品如是世上方書所未用豈易遽辦君直相戲耳趙曰我適見有藥當以與君明日攜一錢匕至豎凝成膏使以匙抄少許入口一日淚止二日腫消三日痛定豁然而愈乃往謁趙致謝且扣其名物笑曰只用羯羊膽去其中脂而滿填好蜜拌勻蒸之候乾即入甕研細為膏以蜂採百花羊食百草故隱其名以眩人云

癸志

班瘡入眼

小兒班瘡入眼皆由熱重毒氣上攻多因食熱物所致
若瘡子盛發時覺眼腫痛時時與開看之睛上無瘡即
不害事若有瘡亦須服清涼飲子每日食後一服微利
之瘡子乾後將撮不如法及飲食不謹或無故眼自痛
者即毒氣不盡也輕者清涼飲重者雄黃解毒丸須大
下三四行然後服治眼藥只得睛不破無不愈者

保生方

眼中常見鏡子

有一少年眼中常見一小鏡子俾醫工趙卿診之與少年期來朝以魚鱸奉候少年及期赴之延於內且令從容俟客退方接俄而設臺子施一瓶芥醋更無他味卿亦未出迨禺中久候不至少年饑甚且聞醋香不免輕啜之逡巡又啜之覺胸中豁然眼花不見因竭瓶啜之趙卿知之方出少年以啜醋慙謝卿曰郎君先因喫鱸太多芥醋不快又有魚鱸在胷中所以眼花適來所備芥

醋欲即君因饑以啜之果愈此疾乃烹鮮之會乃權詐

也

比鎖
夢言

目疾忌俗

有目疾者切忌浴令人目盲

遜齋
閒覽

偷針眼

凡患偷針眼者以布針一箇對井以目睛睨視之已而
拆為兩段投井中眼即愈勿令人見

目視一物為二

荀牧仲頃年常謂予曰有人視一物為兩醫者作肝氣
有餘故見一為二教服補肝藥皆不驗此何疾也予曰
孫真人云目之絲上屬於腦後出於腦中邪中於頭因
逢身之虛其入深則隨目絲於腦入於腦則轉轉則目
絲急急則目眩以轉邪中於睛所中者不相比則睛散
睛散則歧故見兩物也令服驅風入腦藥得愈

本方

洗眼方

以當歸黃連芍藥等分用水濃煎汁乘熱洗冷則再溫

洗甚益眼目但是風毒赤目花醫等皆可用之凡眼目之病皆緣血脉凝滯使然故以活血藥合黃連治之血得熱即行故乘熱洗之用者無不神效

出本草黃連注

口齒喉舌耳

治喉閉

元公張少卿說開德府士人攜僕入京其一忽患喉閉脹滿氣塞不通命在頃刻詢諸郡人云惟馬行街山水李家可看治即與之往李駭曰證候危甚猶幸來此不

然即死何疑乃於筒中取一紙撚用火點著才烟起吹滅之令僕張口刺於喉間俄吐出紫血半合即時氣寬能言及啖粥飲搽藥傳之立愈士人甚神其技後還鄉里村落一庸醫偶傳得此術云咽喉病發於六腑者如引手可探及刺破瘀血即已若發於五臟則受毒牢深手法藥力難到惟用紙撚為第一然不言所以用之之意後有人拾得其殘者益預以巴豆油塗紙故施火即著藉其毒氣徑赴病處

類編

又

凡人患喉閉及纏喉風用藥開得咽喉後可以通得湯水急喫薄粥半碗或一碗壓下邪熱不壓即病再來不可不知也咽喉既可身熱頭痛不除此感外邪看脉氣及大小便有表證則發汗有裏證則微下之皆愈愈後虛喘而身不熱者必是服涼藥過多而下虛也當服鎮重溫藥一服如黑錫丸正一丹之類以粥壓之

咽喉腫毒

有人患咽喉腫病下食不得身熱頭疼大便不通衆醫
之論紛然皆以為熱當服涼藥有一善醫云脉緊數是
感寒氣所致衆醫不從善醫者曰我有法驗得寒熱浴
室中生火用炒朮葱湯淋浴若是病熱則此煖處必有
汗而咽喉痛不減若是感寒則雖浴無汗患信其言遂
入浴淋洗而無汗就浴室中服麻黃湯須臾大汗出大
便通即時無事衆醫服其神凡辨熱病與感冷皆可用

此法

醫餘

巧匠取喉鈎

咸平中職方魏公在潭州有數子弟皆幼因相戲以一鈎竿垂鈎用棗作餌登陸鈎鷄雛一子學之而誤吞其鈎至喉中急引乃鈎以鬚逆不能出命之諸醫不敢措手魏公大怖令人遍問老婦必能經歷時有一老婦九十餘歲言亦未嘗見此切料有智識者可出之時本郡有一莫都料性甚巧令聞魏公魏公呼老婦責之曰吾子誤吞鈎莫都料何能出之老婦曰聞醫者意也其莫

都料曾水中打碑塔添仰瓦魏公大哈親屬勉之曰試
詢之公遂召莫都料至沉思時久言要得一蠶蠶及大
念佛珠一串與之都料遂將蠶翦如錢大用物權四面
令軟以油潤之仍中通一竅先穿上鉤線次穿數珠三
五枚令兒坐正開口漸添引數珠挨之到喉覺至繫鉤
處乃以力向下一推其鉤已下而脫即向上急出之見
蠶錢向下裏定鉤線鬚而出並無所損魏公大喜遂厚
賂之公曰心明者意必大巧意明者心必善醫

名醫
錄

舌腫滿口

一士人汭汭東歸夜泊村步其妻熟寐撼之問何事不
答又撼之妻驚起視之舌腫已滿口不能出聲急訪醫
得一叟負囊而至用藥搽比曉復舊問之乃蒲黃一味

須真者佳

本事方

舌無故出血

一士人無故舌出血仍有小穴醫者不曉何疾偶曰此
名衄炒槐花為末搽之而愈

良方

牙疼

牙疼有四一曰熱二曰冷三曰風四曰虫熱者怕冷水冷者怕熱湯不怕冷熱即是風牙有虫竅者即是虫牙用藥之法熱用牙硝鬱金雄黃荊芥之類冷用乾薑畢撥細辛之類風用猪牙皂角蠶蜂房川草烏之類虫用雄黃石灰砂糖之類熱牙宜於牙齦上出血諸牙痛用藥畢皆以溫湯漱之

醫餘

牙齒日長

牙齒逐日長漸漸脹開口難為飲食益髓溢所致只服

白朮愈

衛生十全方

舌脹出口

有人舌腫脹舒出口外無敢醫者一村人云偶有此藥歸而取至乃二紙撚以燈燒之取烟薰舌隨即消縮衆問之方肯言吾家舊有一牛赤舌腫脹出口人教以草麻取油蘸紙撚燒烟薰之而愈因以治人亦驗

治齒痛

葉景夏家一妾為病齒所苦遇痛作時爬牀刮席叫呼連夕徹旦勺飲不可入口醫者無所不用經年不差或授一方取附子尖天雄尖全蝎七箇皆生碾碎拌和以紙撚蘸少許點痛處隨手則止林元禮云是未足為奇舊得一法捕蚶蚬大者一枚削竹篦子刮其眉即有汁粘其上約所取已甚則放之而以汁點痛處凡瘡蝕癰腫一切齒痛悉可用藥到痛定仍不復作姪孫憫云此名蟾酥膏先以篦掠眉下汁未出時當以細杖鞭其背

及頭候作怒鼓脹則流注如涌然後挹以綿徑室痛處
編類

齩齒

齊中大夫病齩齒淳于意灸其左太陽脉即為苦參湯
日漱三升出入五六日病已得之風及卧開口食而不漱

史記

飲酒漱口

劉几年七十餘精神不衰每一飲酒輒一漱口雖醉不

忘也曰此可以無齒疾晡後食少許物便已

明道雜志

漱口食冷

進士劉遁遇異人曰世人奉養往往倒置早漱口不若將卧而漱去齒間所積牙亦堅固今人食冷物必飲湯將溫其脾已冰其脾又何溫之有不若未食冷物先飲湯溫之繼食冷即無患也

翰苑名談

棗能黃齒

倪彥及朝奉嘗為太原府幕官云彼中人喜食棗無貴

賤老少常置棗於懷袖間等閒探取食之郡人之齒多
黃緣食棗故嵇叔夜所謂齒居晉而黃虱處頭而黑是
也

遯齋
間覽

齒藥

西嶽蓮花峰碑載治口齒烏髭藥歌猪牙皂角及生薑
西國升麻蜀地黃木律旱蓮槐角子細辛荷葉

翦荷葉
心子也

要相當青鹽等分同燒煨研熟將來使更良揩齒牢牙

髭鬚黑誰知世上有仙方

類苑

齒間肉壅出

汪丞相徽之祁門人有寵平日好食動風物性尤嗜蟹
或作蟹魚蟹簽恣噉之一日得風熱之疾齒間壅一肉
出漸大漲塞口不能閉水漿不入痛苦待盡已而有一
道人言能治此疾丞相命醫之不日而愈其法用生地
黃取汁一椀猪牙皂角數銚火上炙令熟蘸汁令盡末
之傅壅肉上隨即消縮多以金與之得此方

其壻李
大夫說

飲酒喉舌生瘡

連月飲酒咽喉爛舌生瘡水中螺蚌肉葱豉薑椒煮汁

飲三盞差

聖惠方

苦參不可潔齒

予嘗苦腰重久坐則旅拒十餘步然後能行有一將佐見予曰得無用苦參潔齒否予時以病齒用苦參數年矣曰此病由也苦參入齒其氣傷腎能使腰重後有太常少卿舒昭亮用苦參揩齒歲久亦病腰自後悉不用腰痛皆愈此皆方書舊不載也

筆談

齒縫出血

齒縫出血不止他藥不能治者鹽主之素問曰鹽勝血

故也

蘭室寶鑑內用麥門冬煎湯漱之亦良

虎鬚治齒痛

虎鬚治齒痛仙人鄭思遠常騎虎故人許隱齒痛求治鄭曰虎鬚及熟挿齒間即愈拔數莖與之

積年耳聾

驢生脂和生薑熟搗綿裹塞耳治積年耳聾

本草按本
草乃生椒

非薑第
未試用

骨哽

韻畧用
腭字

類

治哽以類推

凡治哽之法皆以類推鷓鴣治魚哽磁石治針哽髮灰
治髮哽狸虎治骨哽亦各從其類也

礪砂治哽

鄱陽汪友良因食辣蹄誤吞一骨如小指大哽於咽喉
間隱然見於膚革引手可揣摩百計不下凡累日雖咳

嗽亦痛僅能畧通湯飲家人憂懼於昏睡處次觀一人
著朱衣來告曰聞汝為骨所苦吾有一藥唯南礪砂最
妙恍惚驚寤謂非夢也殆神明陰受以方欲全其命索
藥筭得砂小塊汲水滌洗取而含化才食頃脫然而失

志
壬

呪水治哽

以淨器盛新汲水一盞捧之面東默念云謹請太上東
流水急急如南方火帝律令勅一氣念七遍即吹一口

氣入水中如此七吹以水飲患人立下或用此咒水可

以食針並竹刺

百一選方

漁人治哽

蘇州吳江縣浦村王順富家人因食鰕魚被哽骨橫在
胃中不上不下痛聲動鄰里半月餘飲食不得幾死忽
遇漁人張九言你取橄欖與食即軟也適此春夏之時
無此物張九云若無尋橄欖核搗為末以急流水調服
之果安問張九爾何緣知橄欖治哽張九曰我等父老

傳橄欖木作取魚掉篋魚若觸著即便浮被人捉却所以知魚怕橄欖也今人煮河豚須用橄欖乃知去魚毒也

治哽

滁州蔣教授名南金因食鯉魚玉蟬羹為肋骨所哽凡治哽藥及象牙屑用之皆不效或令以貫衆不拘多少濃煎汁一盞半分三服併進連服三劑至夜一咯而出因戲曰此管仲之力也

百一選方

故魚網治哽

故魚網主哽以網覆哽者頸差如煮汁飲之骨當下矣

草本

倉卒有智

秀州士大夫家一小兒五歲因戲劇以首入搗藥臼中
不復出舉家驚呼無計或教之使執兒兩足以新汲水
急澆之兒驚啼體縮遂得出又有小兒觀打稻取穀芒
寘口中粘著喉舌間不可脫或令以鷺涎灌之即下蓋

驚涎能化穀也二者皆一時甚急非倉卒有智未易脫

夷堅
志

喘嗽

喘有三證

凡人患喘其證有三一曰寒二曰熱三曰水病熱者發於夏而不發於冬冷病者遇寒則發也水病者胸膈滿悶脚先腫也熱病者宜蛤蚧丸冷病宜煮肺散水病審其冷熱虛實虛而冷者紫金丹熱而實者防己丸此出

養生必用方不合防已丸但言腹有濕熱欲驗喘疾是水不是水者小便澀脚微腫而喘者水證也當作水治之小便不澀脚不腫只作喘治之沈存中良方蒲葍葉孫大資麻黃梓朴湯不拘冷熱皆可服也

咳嗽

咳嗽有二一曰熱二曰寒熱嗽有濃痰鼻聞腥氣宜服涼藥寒嗽痰薄宜服熱藥飲冷水一二呷而暫止者熱嗽也呷熱湯而暫止者冷嗽也此法用之有驗以小柴

胡湯治熱嗽以理中湯加五味子治寒嗽皆已試之驗

醫餘
同上

又

經曰人感於寒則受病微則為咳甚為泄為痛凡咳嗽
五臟六腑皆有之惟肺先受邪蓋肺主氣合於皮毛邪
之初傷先客皮毛故咳為肺病五臟則各以治時受邪
六腑則又為五臟所移古人言肺病難愈而喜卒死者
肺為驕臟怕寒而惡熱故邪氣易傷而難治以其湯散

徑過針灸不及故也十種咳嗽者肺咳心咳脾咳腎咳
肝咳寒咳風咳支飲咳膽咳厥陰咳華佗所謂五嗽者
冷嗽氣嗽鱗嗽飲嗽邪嗽孫真人亦有方治寒毒症嗽
者歷代方論著之甚詳惟今之所謂勞嗽者無所經見
意其華佗所謂邪嗽真人所謂症嗽者是也此病蓋酒
色過度勞極傷肺損動經絡其重咯唾膿血輕者時發
時差又有因虛感邪惡之氣且傳症得之或先嘔血而
後嗽或先咳嗽漸就沉羸此非特內損肺經又挾邪惡

傳症之氣所以特甚病之毒害無過此也真人治症嗽
通氣丸方用蜈蚣四節又云夢與鬼交通及飲食者全
用蜈蚣外臺方四滿丸治五嗽亦用蜈蚣近世名公能
推原其旨意率用蛤蚧天靈蓋桃柳枝麝香丹砂雄黃
安息香之類以通神明之藥療之高出古人之意又肺
中有蟲如蠶令人喉痒而咳湯散經過針灸不及以藥
含化蟲死即嗽止

方 鷄峰

治痰嗽

緩帶李防禦京師人初為入內醫官真嬪御閣妃苦痰嗽終夕不寐面浮如盤時方有甚寵徽宗幸其閣見之以為慮馳遣呼李李先數用藥詔令往內東門供狀若三日不效當誅李憂撓伎窮與妻對泣忽聞外間叫云咳嗽藥一文一貼喫了今夜得睡李使人市藥十貼其色淺碧用淡蘼水滴麻油數點調服李疑草藥性獷或使臟腑滑泄併三為一自試之既而無他於是取三貼合為一攜入禁廷授妃請分兩服以餌是夕嗽止比曉

面腫亦消內侍走白天顏絕喜錫金帛厥直萬緡李雖
幸其安而念必宣索方書何辭以對殆亦死耳命僕俟
前賣藥人過邀入坐飲以巨鍾語之曰我見鄰里服汝
藥多效意欲得方倘以傳我此諸物為銀百兩皆以相
贈不吝曰一文藥安得其直如此防禦要得方當便奉
告只蚌粉一物新瓦炒令通紅拌青黛少許爾扣其從
來曰壯而從軍老而停汰頃見主帥有此故剽得之以
其易辦姑藉以度餘生無他長也李給之終身

類文

治齁喘

信州老兵女三歲因食鹽蝦過多遂得齁喘之疾乳食不進貧無可召醫一道人過門見女病喘不止教使求甜瓜蒂七枚研為粗末用冷水半茶鍾許調澄取清汁呷一小呷如其說才飲竟即吐痰涎若膠糍狀胸次既寬齁喘亦定次日再作又服之隨手愈凡三進藥病根如掃此藥味極苦難吞燕俗諺所謂甘瓜蒂苦非虛言也

同上

喘病

李翰林天台人有莫生患喘病求醫李云病日久矣我
與治之乃取青橘皮一片展開入江子一箇將麻線繫
定火上燒烟盡留性為末生薑汁酒一大鍾呷之過口

便定實神方也

名醫錄

肺氣

肺者臟之蓋也肺氣盛則脉大脉大則不得偃卧

肺熱久嗽

有婦人患肺熱久嗽身如炙肌瘦將成肺勞以枇杷葉木通款冬紫苑杏仁桑白皮等分大黃減半如常製為末蜜丸櫻桃大一丸食後夜卧含化未終劑而愈

本草衍義

喘有冷熱

人有喘疾不可一槩治之須分陰陽病發於冬寒冷病也病發於暑月熱病也冷病服豉霜丸清中湯煮肺散熱病服青杏蛤蚧丸之類又有一方孫大資梓朴散不拘冷熱皆可服

醫餘

水喘

有人先因咳嗽發喘胸膈症悶難於倒頭氣上湊者宜早利水道化痰下氣若不早治必成水宜服紫金丹病水人水在膜外切不可鍼鍼透膜初時稍愈再來即不可治

同上

翻胃

治翻胃

淳熙元年冬檇姪自鄱陽往四明過婺州義烏晚泊逆

旅倏有野服者坐予傍扣其何人曰邑醫孫道攻療眼疾
穠與之語孫曰君貴家子弟必藏好方畀我一二或可
為人起疾穠素秘翻胃方即口授之其法用一大附去
其蓋剉中使淨納丁香四十九粒復以蓋覆之用線縛
定寘銀石器中浸以生薑自然汁及蓋而止慢火煮
乾細末一錢匕摻舌上漱津下若煩渴則徐食糜粥忌
油膩生冷孫喜書之於冊未幾州鈴轄苦此病危甚孫
為拯之正用此方數服愈

類編

驢尿治翻胃

驢尿治翻胃外臺載昔幼年經患此疾每食餅及羹粥等須臾吐出貞觀中許奉御兄弟及柴蔣等時稱名醫奉勅令治罄竭其術竟不能療漸至羸憊死在朝夕忽有一術士云服驢小便極驗日服二合後食惟吐一半晡時又服二合人定時食粥吐即便定迄至今日午時奏之大內五六人患翻胃同服一時俱差此藥稍有毒服時不可過多盛取及熱服二合病深七日以來服之

良驗本事方

乾嘔不吐

粥食湯藥皆吐不停灸手間使二十壯若四肢厥脈沉絕不至者灸之便通此起死之法千金方

霍亂

夫霍亂之起皆由起居之失宜飲食之不節露卧濕地或當風取快溫涼不調清濁相犯風冷之氣歸於三焦傳於脾胃真邪相干水穀不化便至吐利皆名霍亂其

揮霍之間便致撩亂診其脈來代者霍亂又脈代而絕者是證也霍亂脈大者可治微細者不可治脈微而遲氣息少不欲言者不可治養生方云七月食蜜令人暴

下
方 鷄峰

醫說卷四

欽定四庫全書

醫說卷五

宋 張杲 撰

心疾健忘

抑情順理

燕居暇日何所用心善養形神周防患疾常存謹畏無失調將食飲之間最為急務安危所繫智力可分與其畏病而求醫孰若明理以自求與其有病而治以藥孰

若抑情而預治情斯可抑理亦漸明能任理而不任情則所養可謂善養者矣防患却疾之要其在茲乎

食治通說

心疾

韋綬李蟠俱以心疾廢綬常疑遇毒鎖井而飲李益少而疑病心亦心疾也心靈府也為外物所中終身不痊多思慮多疑惑病之本也

國史補

驚氣入心

治驚氣入心絡瘡不能語蜜陀僧研細服一匕許茶調

服遂愈有人因伐薪山間為狼所逐而得是疾或授以此方亦愈又一軍校採藤於谷逢惡蛇而病其狀正同亦用此藥療之而愈已

志已

神志恍惚

韓宗武侍父官洋州得異疾與神物遇頗不省人事神志恍惚或食或不食國醫陳易簡教服蘓合香凡後數

月所遇者忽不至

類編

神氣不寧

明州董生患神氣不寧每卧覺身在牀而神離體驚悸多魘通夕不寐許為診視詢諸醫作何證曰心病也許曰是肝經受邪非心病也肝藏魂者也遊魂為變平人肝不受邪故魂宿于肝神靜而得寐今肝經因虛邪氣襲之魂不歸舍是以臥則揚揚若去體肝主怒故小怒輒劇董喜曰前此未之聞雖未服藥已覺沉痾去體矣願求藥法許曰君且持此說與衆醫議所治之方而徐質之閱旬日復至曰醫徧議古今方書無與病相對者

許乃為處珍珠丸獨活湯二方以贈服一月而病悉除
其方大體以珠母為君龍齒佐之珠入肝經為第一龍
齒與肝同類故也龍齒虎睛今人例作鎮心藥而不知
龍齒安魂虎睛定魄各言其類也龍能變化故魂遊而
不定虎能專靜故魄止而有守當隨其宜而治之載本
事方一卷

健忘詩

治心氣不足健忘詩云桂遠人三四天菖地亦同茯苓

加一倍日誦萬言通廼官桂遠志人參巴戟天石菖蒲

地骨皮

瑣碎錄

忽不識字

松滋令姜愚無他疾忽不識字數年方稍稍復舊

筆談

治人心昏塞多忘喜誤

七月七日取蜘蛛網著衣領中勿令人知不忘

本草

治惡夢

錢丕少卿忽夜多惡夢但就枕便成輒通夕不止後因

赴官經漢上與鄧州推官胡用之相遇驛中同宿遂說
近日多夢慮非吉兆胡曰昔嘗如此驚怕特甚有道士
教戴丹砂初任辰州推官求得靈砂雙箭鏃者戴之不
涉旬即驗四五年不復有夢至今秘惜因解髻中一絳
紗袋遺之即夕無夢神寬安靜真誥及他道書多載丹
砂辟惡豈不信然

類編

麝枕

置麝枕中可絕惡夢

物類相感志

癲疾

素問曰人生而病癲疾者安得知之岐伯曰病名為胎病此得之在母腹中時其母有所大驚氣上而不下精氣並居故令子發為癲疾也

御覽

又

癲狂之疾何以別答曰狂之始發少臥少飢自賢自貴妄笑好樂

又

癲者精神不守言語錯亂甚則登高罵詈或至狂走癇者發則仆地嚼舌吐沫手足搐搦或作六畜之聲頃刻則癲癲者邪入於陰經一曰陽併則狂癲者邪干於心其處方用藥亦皆相類

狂

凡人患癲狂叫喚打人者皆心經有熱當用鎮心藥兼大黃與之瀉數日然後服安神及風藥但得寧靜即是安樂不可見其瘦弱減食便以溫藥補之病必再作戒

之戒之緩緩調飲食可也

御覽

魔不寤

人眠則魂鬼外遊為邪鬼所魔屈其精神弱者魔則久不得寤乃至氣絕所以須旁人助喚并以方術治之低

聲遠喚即活

雞岑方

夢

陰盛則夢涉大水恐懼陽盛則夢大火燔灼陰陽俱盛則夢相殺毀傷上盛則夢飛下盛則夢墮飽則夢予飢

則夢取肝氣盛則夢怒肺氣盛則夢哭

臥而不寐

老人臥而不寐少壯寐而不寤何耶少壯者血氣盛肌肉滑氣道通榮衛之行不失於常故晝日精夜不寤也老人血氣衰肌肉不滑榮衛之道濇故晝日不能精夜不得寐也

小便如泔

一男子小便日數十次如稠米泔色亦白心神恍惚瘦

瘁食減以女勞得之服此桑螵蛸散未終劑而愈安神
鬼定心志治健忘小便數補心氣桑螵蛸遠志菖蒲龍
骨人參茯神當歸龜甲醋炙以上各一兩為末每服二

錢夜卧人參湯調

本草
衍義

夜魘

夜魘之人急取梁上塵內鼻中即醒戒以燈照之

錄鎖碎

暮卧呪

道林曰暮臥常以手撫心上呪曰天靈節榮願得長生

五臟君侯願其安寧男一七遍女二七遍長生不病

真修

秘訣

桑葉止汗

嚴州山寺有一遊僧形體羸瘦飲食甚少每夜就枕遍身出汗迨旦衣服皆透濕如此二十年無復可療唯待盡耳監寺僧曰吾有藥絕驗為汝治之三日宿疾頓愈遂并授以方乃單用桑葉一味乘露採摘控焙乾碾為末二錢空腹溫米飲調或值桑落乾者亦堪用但力不

如新者按本草亦載桑葉主止汗其說可証

辛志

大驚發狂

許叔微本事方云軍中有一人犯法褫衣將受刃得釋神失如癡予與驚氣丸一粒服訖而寐及覺病已失矣江東張提轄妻因避寇失心已數年予授其方隨愈又黃山沃巡檢妻狂厥踰年更十餘醫而不驗予授其方去附子加鐵粉亦不終劑而愈鉄粉非但化涎鎮心至如摧抑肝邪特異若多恚怒肝邪大盛鉄粉能制伏之

素問言陽厥狂怒治以鐵落鉤金制木之意也

犯大麥毒

齊州有人病狂每歌曰五靈華蓋曉玲瓏天府由來汝
府中惆悵此情言不盡一九蘿蔔火吾宮又歌曰踏陽
春人間二月雨如塵陽春踏盡秋風起腸斷人間白髮
人後遇一道士作法治之乃云夢中見一紅裳少女引
入宮殿皆紅紫飾小姑令歌道士曰此正犯大麥毒女
則心神小姑脾神也按醫經蘿蔔治麪毒故曰火吾宮

即以藥并蘿蔔食之遂愈

洞微志

夢遺

有人夢遺精初有所見後來雖夢中無所見日夜不拘
常常遺漏作心氣不足服心氣藥無驗作腎氣虛補腎
藥亦無驗醫問患者覺腦冷否應之曰只為腦冷服駝
寒藥遂安蓋腦者諸陽之會髓之海腦冷則髓不固是
以遺漏也有此疾者先去腦中風冷腦氣沖和兼服益
心腎藥無不愈者

心脉溢關

王叔和脉訣論曰溢關骨痛心煩燥通真子解云心脉盛而溢關則筋緊而骨束是以骨痛師曰筋緊有筋攣疾豈得骨痛所以心脉盛而骨痛者心属火骨属腎水心脉溢關則水不勝火煎熬得骨痛非筋緊也

醫餘同上

瘖

黃帝問曰人有重身九月而瘖此為何也岐伯對曰胞之絡脉絕也帝曰何以言之岐伯曰胞絡者繫於腎少

陰之脉貫腎繫舌本故不能言帝曰治之奈何岐伯曰
無治當十月復

人臥血歸於肝

人卧血歸於肝肝受血而能視足受血而能步掌受血
而能握指受血而能攝

血脉

脉者血之腑脉實血實脉虛血虛

笑歌狂疾

開元中有名醫紀朋者觀人顏色談笑知病深淺不待
診脉帝聞之召於掖庭中看一宮人每日晏則欲歌啼
號若狂疾而足不能履地朋視之曰此必因食飽而大
促力頓仆於地而然乃飲以雲母湯令熟寐覺而失所
苦問之乃言因大華公主載誕宮中大陳歌吹某乃主
謳懼其聲不能清且長喫狔蹄羹飽而當筵歌大曲曲
罷覺胸中甚熱戲於砌臺上高而墜下久而方甦病狂
足不能步也

明皇
雜錄

膈噎諸氣

氣膈

齊王中子諸嬰兒小子病召臣意診切其脉告曰氣膈
病病使人煩慙食不下時嘔沫病得之少憂數忤食飲
意即為之作下氣湯以飲之一日氣下二日能食三日
即病愈所以知小子之病者診其脉心氣也濁躁而經
也此絡陽病也脉法云脉來數疾去難而不一者病主
在心周身熱脉盛者為重陽重陽者過

音唐

心主故煩慙

食不終下則絡脉有過絡脉有過則血上出血上出者死此悲心所生也病得之憂也

史記

五膈

古今論膈氣乃有五種謂憂膈悲膈氣膈寒膈熱膈也夫胸中氣結煩悶飲食不下羸瘦無力此乃憂膈心下實滿食不消化噫輒醋心大小便不利此名悲膈胸脇逆滿咽喉閉塞噫聞食臭此名氣膈心腹脹滿欬逆腸鳴食不生肌此名寒膈五心中熱口舌生瘡骨煩體重

唇乾口燥背痛胸痺此名熱膈

五噎諸氣

婦人多有此疾

此病不在外不在內不屬冷不屬熱不是實不是虛所以藥難取效此病緣憂思恚怒動氣傷神氣積於內氣動則諸證悉見氣靜疾候稍平手捫之而不得疾之所在目視之而不知色之所因耳聽之而不知音之所發故鍼灸服藥皆不獲效此乃神氣間病也頃京師一士人家有此證勸令靜觀內外將一切用心力事委之他

人服藥方得見効若不如如此恐卒不能安但依此戒兼
之灼艾膏肓與四花穴及服此三藥可以必差孫真人
云婦人嗜欲多於丈夫感病倍於男子加以慈戀愛憎
疾妬憂患染著堅牢情不自抑所以為病根深療之難
差

雞峯方
同上

五噎

噎病亦有五種氣噎憂噎食噎勞噎思噎噎者乃噎塞
不通心胸不利飲食不下也各隨其證而治之

靛治噎疾

廣五行記治噎疾永徽中絳州有僧病噎數年臨死遺言令破喉視之得一物似魚而有兩頭徧體悉是肉鱗置鉢中跳躍不止以諸味投鉢中須臾悉化為水時寺中方刈藍作靛試取少靛置鉢中此蟲遶鉢畏避須臾化為水世人以靛治噎疾

良方

糠治卒噎

春杵頭細糠治卒噎陶隱居云食卒噎不下刮取含之

即去亦是春擣義爾天下事理多有相影響如此也日

華子云治卒噎煎湯呷

本草

病噎吐蛇

華佗行道見一人病噎嗜食而不得下家人車載欲往就醫佗聞其呻吟駐車往視語之曰向來道傍有賣餅家蒜齏大酢從取三升飲之病自當差即如佗言立吐蛇一條懸之車邊欲造佗佗尚未還佗家小兒戲門前迎見自相謂曰客車邊有物必是逢我公也疾者前入

見佗壁北懸此蛇革以十數

御覽

食飴主噎

吳廷紹為太醫令烈祖因食飴喉中噎國醫皆莫能愈
廷紹尚未知名獨謂當進楮實湯一服疾失去羣醫默
識之他日取用皆不驗或扣之荅曰噎因甘起故以楮

實湯治之

南唐書

百病生於氣

百病生於氣怒則氣上喜則氣緩悲則氣消恐則氣下

寒則氣收是則氣泄驚則氣亂勞則氣耗思則氣結九氣不同何病之生

天地氣所主

天地之數起於上而終於下歲半之前天氣主之歲半之後地氣主之上下交互氣交主之歲紀畢矣

氣虛氣逆

邪氣盛則實精氣奪則虛氣虛者肺虛也氣逆者足寒也非其時則生當其時則死餘臟皆如此

有餘不足

神有餘有不足氣有餘有不足血有餘有不足形有餘有不足志有餘有不足凡此十者其氣不等

重虛

脉虛氣虛尺虛是謂重虛

寒熱厥

陽氣衰於下則為寒厥陰氣衰於下則為熱厥

氣候

五日謂之候五候謂之氣六氣謂之時四時謂之歲

六氣

天氣通於肺地氣通於嗌風氣通於肝雷氣通於心谷
氣通於脾雲氣通於腎腸胃為海九竅為水

胃氣五臟之本

五臟皆稟氣於胃胃者五臟之本臟氣不能自致於手
太陰必因胃氣

四時五行五臟五氣

天有四時五行生長收藏以生寒暑燥濕風人有五臟
化五氣以生喜怒憂悲恐故喜怒傷氣寒暑傷形暴怒
傷陰暴喜傷陽

旦暮

平旦人氣生日中陽氣隆日西陽已虛氣門已閉是故
暮而收拒無擾筋骨無犯霧露反此二時形乃困薄

四時之氣更傷五臟

春傷於風邪氣留連乃為洞泄木勝脾土故也夏傷於

暑秋為瘧疾秋傷於濕上逆而發為痿厥冬傷於寒
春必溫病四時之氣更傷五臟

五臟所藏

心藏神肺藏魄肝藏魂脾藏意腎藏志是為五臟所藏

五臟所傷

久視傷血久臥傷氣久坐傷肉久立傷骨久行傷筋是
為五臟所傷

五臟之脉

肝脉弦心脉鉤脾脉代肺脉毛腎脉石是為五臟之脉

五入

酸入肝辛入肺苦入心鹹入腎甘入脾是為五入

五惡

心惡熱肺惡寒肝惡風脾惡濕腎惡燥是為五惡

五液

五臟化液心為汗肝為淚肺為涕脾為涎腎為唾是為

五液

五主

心主脉肺主皮肝主筋脾主肉腎主骨是為五主

五禁

辛走氣氣病無多食辛鹹走血血病無多食鹹苦走骨
骨病無多食苦甘走肉肉病無多食甘酸走筋筋病無
多食酸是為五禁

汗出

飲食飽甚汗出於胃驚而奪精汗出於心持重遠行汗

出於腎疾走恐懼汗出於肝搖體勞苦汗出於脾

體有可已之疾

孫思邈居太白山於惟步醫藥無不善盧照鄰有惡疾不可為而問曰高醫愈疾奈何荅曰天有四時五行寒暑迭居和為雨怒為風凝為霜雪張為虹蜺天常數也人之四肢五臟一覺一寐吐納往來流為榮衛張為氣色發為音聲人常數也陽用其形陰用其精天人所同也失則蒸生熱痞生寒結為瘤贅陷為癰疽奔則喘乏

竭則焦槁發乎面動乎形天地亦然五緯縮羸字彗飛
流其危沴也寒暑不時其蒸否也石立土坼是其贅瘤
山崩土陷是其癰疽奔風暴雨是其喘乏川瀆竭涸是
其焦槁高醫導以藥石投以砭劑聖人和以至德輔以
人事故體有可已之疾天有可救之災

唐書

消渴

渴服八味丸

千金云消渴病所忌者三一飲酒二房室三鹹食及麪

能忌此雖不服藥亦自可消渴之人愈與未愈嘗須慮患大癰必於骨節間忽發癰疽而卒予親見友人邵任道患渴數年果以癰疽而死唐祠部李郎中論消渴者腎虛所致每發則小便甜醫者多不知其疾故古今亦闕而不言洪範言稼穡作甘以物理推之淋飴醋酒作脯法須臾即能甜也足明人食之後滋味皆甜流在膀胱若腰腎氣盛是為真火上蒸脾胃變化飲食分流水穀從二陰出精氣入骨髓合榮衛行血脉榮養一身

其次已為脂膏其次以為血肉也其餘則為小便故小便色黃血之餘也臊氣者五臟之氣鹹潤者則下味也腰腎既虛冷則不能蒸於穀氣則盡下為小便故味甘不變其色清冷則肌膚枯槁也猶如乳母穀氣上泄皆為乳汁消渴病者下泄為小便皆精氣不實於內則小便數澀溺也又肺為五臟華蓋若下有暖氣蒸則肺潤若下冷極則陽氣不能升故肺乾則渴易於否卦乾上坤下陽無陰而不降陰無陽而不升上下不交故成否

也譬如釜中有水似火暖之其釜若以板覆則暖氣上騰故板能潤也若無火力水氣則不能上此板則終不能潤也火力者則是腰腎強盛也常須暖補腎氣飲食得火力則潤上而易消亦免乾渴也故張仲景云宜服腎氣八味丸此病與脚氣雖同為腎虛所致其脚氣始發於二三月盛於五六月衰於七八月凡消渴始發於七八月盛於十一月十二月衰於二三月其故何也夫脚氣壅疾也消渴宣疾也春夏陽氣上故壅疾發則宣

疾愈秋冬陽氣下故宣疾發則壅疾愈也審此二者疾可理也猶如善為政者寬以濟猛猛以濟寬隨事制度耳仲景云足太陽者膀胱之經也膀胱者腎之腑小便數此為氣盛氣盛則消穀大便硬衰則為消渴也男子消渴飲一斗小便亦得一斗宜八味腎氣丸

本事方

又

眉山有揭頴臣者長七尺健飲啖侔儻人也忽得消渴疾日飲水數斗食常倍而溺數消渴藥服之逾年疾日

甚自度必死治棺衾屬其子詢於人蜀有良醫張肱隱之子不記其名為診脉笑曰君幾誤死矣取麝香當門子以酒濡之作十許丸取枳枸子為湯飲之遂愈問其故張生曰消渴消中皆脾衰而腎敗土不能勝水腎亦不上汴乃成此疾今診穎臣脾脉極巨脉熱而腎不裒當由果實與酒過度虛熱在脾故飲食兼人而多飲飲水既多不得不多溺也非消渴也麝香能敗酒瓜果近輒不結而枳枸亦能勝酒屋外有此木屋中釀酒不熟

以其木為屋其下亦不可釀酒故以二物為藥以去酒
果之毒宋玉云枳枸來巢以其實如鳥乳故能來巢今
俗訛謂之雞矩子亦謂之癩漢指頭蓋取其似也嚼之
如牛乳小兒喜食之

大全集

又

昔有仕宦患消渴醫者謂其不過三十日死棄官而歸
半途遇一醫人令急遣人致北梨二擔食盡則差仕宦
如其言得之才渴即食未及五六十枚而病止

仲景治渴

提點鑄錢朝奉郎黃沔久病渴極疲瘁予每見必勸服八味丸初不甚信後累醫不痊謾服數兩遂安或問渴而以八味丸治之何也對曰漢武帝渴張仲景為處此方蓋渴多是腎之真水不足致然若其勢未至於消但進此劑殊佳且藥性溫平無害也

洎宅編

浮石止渴

交州記曰浮石體虛而輕煮飲止渴

苦酒消渴

卞蘭苦酒消渴時魏明帝信巫女用水方使人持水賜
蘭蘭不肯飲詔問其意蘭言治病自當以方藥何信於
此帝為變色而蘭終不服

三國志

熱中消中富貴人

多飲數溺曰熱中多食數溺曰消中多喜曰癩多怒曰
狂熱中消中皆富貴人也

內經

心腹痛

心痛

心藏神心者身之主也其正經為風邪所乘名真心痛
旦發夕死夕發旦死心有包絡脉是心之別脉為風冷
所乘亦令心痛然乍輕乍盛不至於死又手少陰心之
經其氣逆謂之陽虛陰厥亦令心痛其痛引喉是也其
心下急痛名脾心痛腹脹而心痛名胃心痛下重而苦
泄寒中為腎心痛又有九種心痛一蟲二疰三風四悸
五食六飲七冷八熱九去來此皆邪氣乘於手少陰之

絡邪氣搏於正氣邪正相擊故令心痛診其心脉急者
為痛引背食不下寸口脉沉緊苦心下寒時痛關上脉
緊心下苦痛左手寸脉沉則為陰陽絕者無心脉也苦
心下毒痛

雞峯方

腹痛有數種

有人患腹痛其狀不一有風痛熱痛有冷痛有冷積痛
有氣積痛有蟲痛有婦人經脉行而先腹痛有小兒瘡
疹出而先腹痛者滿腹虛脹服暖藥無效者此風痛也

宜服官局胃風湯火欬草丸如附子烏頭之類大便秘結小便赤而喜冷飲食者此熱痛也後生宜四順飲老人宜服大麻仁丸皆局方有塊起而腹痛者皆積也冷積則面無色瘦瘁脉沉伏宜於暖藥中用巴豆如官局積氣丸之類氣積多噫氣宜服嘉禾散調氣散五膈寬中散如茴香丁香木香沉香之類食積則多噫酸口出清水惡心宜服京三稜蓬莪朮乾漆之類亦須兼巴豆至於腹中有塊起急以手按之便不見五更心嘈牙關

擣硬惡心而清水出及夢中嚙齒此謂之蟲痛宜服官
局化蟲丸如史君子之類又有室女婦人月經行先腹
痛此特與諸痛不同只可服四物湯小兒身熱足冷耳
及尻骨冷及眼澁者皆瘡疹候必先腹痛蓋疹子先自
腸胃中出然後發於外宜服葛根升麻湯及綿煎散之
類舒王解痛字云宜通而塞則為痛此極有理凡痛須
通利臟腑乃能隨其冷熱而須用巴豆大黃牽牛此最

要法

醫餘

大瀉腹痛

有人每日早起須大瀉二行或時腹痛或不痛空心服熱藥亦無效後有智者察之令於晚食前更進熱藥遂安如此常服竟無恙蓋暖藥雖平旦空腹至晚藥力已過一夜陰氣何以敵之於晚間再進熱藥則一夜暖藥在腹遂可以勝陰氣凡治冷疾皆如此

暑月破腹

一曰傷暑二曰傷冷物食瓜果飲水之類三曰夏季心

火旺心經熱則小水不利行大腸謂之水穀不分傷暑而瀉者心躁頭痛作渴宜服香薷飲烏金散傷冷物而瀉者腹痛水瀉穀食不化宜服暖藥如附子及理中丸二氣丹正元丹紫蘓丸之類水穀不分者宜服大順散五苓散二藥專分清濁暑月多此疾故人多用之凡瀉不可急以熱藥止之恐成痢

同上

小腹切痛

治腎氣小腹切痛元豐中丞相王邠公小腹痛不止宣

差太醫攻治備至皆不效凡藥至熟如附子硫黃五夜
又丸之類用之亦不差駙馬張都尉令取婦人油頭髮
燒如灰細研篩過溫酒調二錢即時痛止

良方

真心痛

頭心之病有厥痛有真痛手三陽之脉受風寒則名厥
頭痛入連在腦者名真頭痛其五臟氣相干名厥心痛
其痛甚但在心手足青者名真心痛其真心痛者一發
夕死夕發旦死

脾疼

張思順盛夏調官都城苦熟食冰雪過多又飲木瓜漿積冷于中遂感脾疼之疾藥不釋口殊無退証累歲日齋一道人適一道人曰我受官人供固非所惜但取漢椒二十一粒浸於漿水盥中一宿漉出還以漿水吞之若是而已張如所戒明日椒才下腹即脫然更不復作

類編

冰煎理中丸

泗州楊吉老名醫也微廟常苦脾疾國醫進藥俱不效遂召吉老診視訖進藥微廟問何藥吉老對以大理中丸上云朕服之屢矣不驗吉老曰臣所進湯使不同陛下之疾以得冰太過得之今臣以冰煎此藥欲已受病之源果一二服而愈

心痛食地黃麪

崔元亮海上方治一切心痛無問久新以生地黃一味隨人所食多少搗取汁搜麪作餅飪或作冷淘良久當

利出蟲長一尺許頭似壁宮後不復患劉禹錫傳信方
貞元十年通事舍人崔抗女患心痛氣垂絕遂作地黃
冷淘食之便吐一物可方一寸以來如蝦蟇狀無目足
等微似有口蓋為此物所食自此頓愈麪中忌用鹽

本方

膀胱氣痛

歙縣尉宋荀甫膀胱氣作痛不可忍醫者以剛劑與之
痛愈甚洩溺不通三日許學士視其脉曰投熱藥太過

適有五花散一兩分為三易其名用連鬚葱一莖茴香
及鹽少許水一盞半煎七分連服之中夜下小便如墨
汁一二升臍下寬得睡明日脉已平續用礪砂丸數日
愈蓋是疾本因虛得不宜驟進補藥邪之所湊其氣必
虛留而不去其病則實故先滌所蓄之邪然後補之

本
事

方

砂石淋

鄞縣尉耿夢得妻苦砂石淋十三年每溺時器中剥剥

有聲痛楚不堪說命採苦杖根俗呼為杜牛膝者淨洗
碎之凡一合用水五盞煎耗其四而留其一去滓以麝
乳香末少許研調服之一夕愈同上

頭垢治淋

頭垢主淋閉不通又主噎亦治勞復

本草

諸瘡

瘡名不同

病者發寒熱一歲之間長幼相若或染時行變成寒熱

名曰疫瘧寒熱日作夢寐不祥多生恐怖名曰鬼瘧宜用禁避厭禳之乍寒乍熱乍有乍無南方多此名曰瘧瘧寒熱善飢而不能食食已肢滿腹急疔痛病以日作名曰胃瘧六腑無瘧唯胃有者蓋飲食肌飽所傷胃氣而成世謂之食瘧飲食不節變成此證有經年不差者後復發速行久立下至微勞力皆不任名曰勞瘧亦有數年不差百藥不斷結為癥癖在腹脅名曰老瘧亦名母瘧

又

說文曰瘡寒熱並作也。瘡熱瘡也。疾二日一發。

又

凡人患瘡疾皆因傷暑治之之法當用暑藥。素問瘡論有三陰三陽辨其證候各隨經而刺之。寒多者用溫藥熱多者用涼藥。不易之法也。有積者必腹痛。當用巴豆藥去其積。有熱者當用小柴胡湯。有寒者當用朱砂硫黃大蒜之類。然瘡疾住後不可服補藥。補之必再作。

驢軸治癰

療癰無久新發無期者驢尾下軸垢水洗取汁和麪如彈凡二枚作燒餅瘡未發前食一枚至發後食一枚

庚志

疔疾

毛宦甫事母葉夫人極孝葉年六十一歲病疔旬餘憂甚每夕禱于北辰拜且泣妹立母側恍惚間有告者曰何不服五苓散持一帖付之啟視皆紅色妹曰尋常此藥不如是安可服俄若夢覺以語兄兩醫云此病蓋蘊

熱所致當加朱砂於五苓散以應神言才服罷痞不復作

又

有宗室以恩添差通判常州郡守不甚加禮遂苦痞疾久而弗愈族人士遽為鈴轄素善醫往問正聚語痞作而顛撼掖不醒盡室駭懼遽云無傷也是中心抑鬱陰陽交戰至于隕厥正四將軍飲子證也先令灼艾灸至四百壯了無蘇意於是急製藥以一大附子炮去皮臍

四分之訶子四箇炮去核陳皮四箇全者洗淨不去白
甘草四兩炙各自切碎為四服用水二盞薑棗各七煎
去五之三藥成持飲病者初一杯灌之不納至再稍若
吞嚥三則倏起坐四服盡頓愈更不復作一時救急如
此凡病痞臨發日逐杯併服無不神效

類編

瘡疾

瘡之病候經綸載之詳矣先寒後熱名曰寒瘡先熱後
寒名曰溫瘡但熱無寒名曰瘧瘡但寒無熱名曰牝瘡

是皆發作有時若邪氣中於風府則間日而作邪氣客
於頭項則頻日而作氣有虛實邪中異所故有早晚之
異然經止論寒溫痺瘡所受之因而不及牝瘡又論溫
瘡痺瘡所舍之藏而不及寒瘡意有互見發明處學者
究陰陽之盛衰深思以得之大抵風者陽氣也寒者陰
氣也先傷於風後傷於寒即先熱後寒先傷於寒後傷
於風即先寒後熱陰氣先絕陽氣獨發則但熱無寒陽
氣先絕陰氣獨發則但寒無熱以溫瘡得之於冬邪氣

藏於骨髓則知寒瘧乃得之於夏邪氣客於皮膚腠理之間矣以痺瘧之氣實而不泄且不及於陰則知牝瘧乃氣虛而泄且不及於陽矣是皆不出於陰陽上下交爭虛實更作也又有挾諸溪毒嵐瘴鬼邪之氣亦寒熱羸瘦延引歲月休作有時久不已變成勞瘧或結為癥瘕者名曰瘧母至於五臟三陽三陰瘧者皆因臟氣偏虛故邪氣乘而舍之其治法合隨其經絡灸刺及所用

藥各不同後學宜細詳之

類編
同上

病有不可補者

病有不可補者一曰瘡疾二曰狂疾三曰水氣四曰腳氣此四疾治得稍愈切不可服暖藥以峻補之如平平

補藥亦須於本病上有益乃可

醫餘

癥瘕

癥瘕

癥瘕之狀雖同而不動者為癥其治有法而可推移者名瘕又病輕於癥瘕不動者必死之候其發語聲嘶挹

言語而不出此人食結在腹其病寒口中常有水出四肢洒又如瘧飲食不能鬱而又痛此食瘕也

遺積瘕

齊中尉潘滿如病小腹痛臣意診其脉曰遺積瘕也臣意即謂齊太僕臣饒內史臣繇曰中尉不復自止於內則三十日死後二十餘日溲血死病得之酒且內所以知潘滿如病者臣意切其脉深小弱其卒然合合也是脾氣也右脉氣口至緊小見瘕氣也以次相乘故三十

日死三陰俱搏者如法不俱搏者決在急期一搏一代者逆也故其三陰搏洩血如前止

史記

蜥瘕

臨菑女子薄吾病甚衆醫皆以為寒熱篤當死臣意診其脉曰蜥大為病腹大上膚黃簾循之戚戚然臣意飲以芫花一撮即出蜥可數升病已三十日如故蜥得之於寒濕寒濕氣鬱篤不發化為蟲臣意所以知薄吾病者切其脉循尺其尺索刺簾而毛美奉髮是蟲氣也其色

澤者中藏無邪氣及重病

史記

蛇瘕

隋有患者嘗飢而吞食則下至胸便即吐出醫作噎食
膈氣翻胃三候治之無驗有老醫任度視之曰非此三
疾蓋因食蛇肉不消而致斯病但揣心腹上有蛇形也
病者曰素有大風嘗求蛇肉食風稍愈復患此疾遂以
芒硝大黃合而治之微泄利則愈醫皆記其驗而知蛇
瘕也

米瘕

乾德中江浙間有慎道恭者肌瘦如勞唯好食米闕之則口中清水出情似憂思食米頓便如常衆醫不辯後遇蜀僧道廣處方以雞屎及白米各半合共炒為末以水一鍾頓調服良久病者吐出如米形遂差病源謂米瘕是也

髮瘕

徐文伯字德秀篤好醫術宋明帝宮人患腰痛牽心發

則氣絕衆醫以為肉瘕文伯視之曰此髮瘕也以油灌之即吐物如髮稍長引之長三尺頭已成蛇又能搖動懸柱上水漑盡唯餘一髮而已遂愈

名醫錄
同上

斛二瘕

續搜神記有人能飲茗至一斛二斗忽飲過量數升吐出一物如牛肺以茗澆之容一斛二斗因名曰斛二瘕

封演見
聞錄

食髮致疾

唐書曰甄權弟立言善醫時有尼明律年六十餘患心腹膨脹身體羸瘦已經二年立言診其脉曰腹內有蟲當是誤食髮為之耳因令服雄黃須臾吐一蛇如人手小指唯無眼燒之猶有髮氣其疾乃愈

瘕

異苑曰章安有人元嘉中噉鴨肉乃成瘕病胸滿面赤不得飲食醫令服秫米須臾煩悶吐一鴨雛身喙翅皆已成就唯左脚故綴昔所食肉病遂獲差志怪曰有人

得瘕病腹晝夜切痛臨終救其子曰吾氣絕後可剖視之其子不忍違言剖之得一銅酒鎗容數合許華佗聞其病而解之便出巾櫛中藥以投鎗又即消成酒焉

太平

御覽
同上

鼈瘕

景成弟長子拱年七歲時脅間忽生腫毒隱隱見皮裏一物頗肖鼈形微覺動其轉掣痛不堪忍德興古城村有外醫曰洪豆腐見之使買鮮蝦為羹以食咸疑以為

瘡毒所忌之味醫竟令食之下腹未久痛即止喜曰此
真鼈瘕也吾求其所好以嘗試之爾乃合一藥如療脾
胃者而碾附子末二錢投之數服而消明年病復作但
如前補治遂絕根本

類編

鼈瘕

鼈瘕者謂腹中瘕結如鼈狀是也有食鼈觸冷不消而
生者亦有食諸雜肉得冷變化而成者皆由脾胃氣虛
弱而遇冷則不能尅消所致瘕言假也謂其有形假而

推移也昔曾有人共奴俱患鼈瘕奴在前死遂破其腹
得一白鼈仍故活有人乘白馬來看鼈白馬遂尿隨落
鼈上即縮頭及尋以馬尿灌之即化為水其主曰吾將
差矣即服之果如其言得差

巢氏
病源

瘕癖

夫瘕癖之病大同而小異瘕者近臍左右成條大者如
臂次者如弦之狀癖在兩肋之間有時而痛此皆由陰
陽不和經絡痞隔飲食停滯不得宣流邪冷之氣搏結

而成也

雞岑方

京三稜治癥瘕

昔人患癥瘕死遺言令開腹取之得病塊乾硬如石文理有五色人謂異物竊取削成刀柄後因以刀刈三稜柄消成水乃知此可療癥瘕也

本草

諸蟲

應聲蟲

永州通判廳軍員毛景得奇疾每語喉中必有物作聲

相應有道人教令學誦本草藥名至藍而默然遂取藍
捩汁而飲之少頃吐出肉塊長二寸餘人形悉具劉襄
子思為永倅景正被疾踰年親見其愈

泊宅編

又

陳正敏遯齋閒覽載楊勔中年得異疾每發言應答腹
中有小聲效之數年間其聲寢大有道士見而驚曰此
應聲蟲也久不治延及妻子宜讀本草遇蟲不應者當
取服之勔如言讀至雷丸蟲忽無聲乃頓服數粒遂愈

正敏其後至長沙遇一丐者亦有是疾環而觀之甚衆
因教便服雷丸丐者謝曰某貧無他技所以求衣食於
人者唯藉此爾以上皆陳所記予讀唐張鷟朝野僉載
云洛州有士人患應聲語即喉中應之以問良醫張文
仲張經夜思之乃得一法即取本草令讀之皆應至其
所畏即不言仲乃錄取藥合和為丸服之應時而止乃

知古有是事

百衲居士錢
圖山叢話

虬蟲

蛇蟲九蟲之數人腹中皆有之小兒失乳而哺早或食甜過多胃虛蟲動令人腹痛惡心口吐清水腹上有青筋火煨史君子與食以殼煎湯送下甚妙然世人多於臨臥服之又無日分多不驗唯是於月初四五間五更服之至日午前蟲盡下可以和胃溫平藥一兩日調理之不可多也凡蟲在人腹中月上旬頭向上中旬橫之下旬頭向下故中下旬用藥即不入蟲口所以不驗也牛馬之生子上旬生者行在母前中旬生者並肩而行

下旬生者後隨之猫之食鼠亦然上旬食上段中旬吃中段下旬下段自然之理物皆由之而莫知之

醫餘

五臟之蟲

心蟲曰蛔脾蟲寸白腎蟲如寸截絲縷肝蟲如爛杏肺蟲如蠶皆能殺人惟肺蟲為急肺蟲居肺葉之內蝕人肺系故成療疾咯血聲嘶藥所不到治之為難有人說道藏中載諸蟲皆頭向下唯自初一至初五以前頭上行故用藥者多取月朏以前蓋此也如療寸白用良方

錫沙蕪萸檳榔者極佳五更服蟲盡下白粥將息藥用
石榴根濃汁半升下散三錢丸五枚

本事方

九蟲之狀

九蟲者一曰伏蟲長四分為羣蟲之長二曰白蟲長一
寸相生至多其母長至四五寸則殺人三曰肉蟲狀如
爛杏令人煩滿四曰肺蟲其狀如蠶令人咳五曰胃蟲
狀如蝦蟇令人吐逆嘔噦六曰弱蟲狀如瓜瓣令人多
唾七曰赤蟲狀如生肉令人腸鳴八曰蟯蟲至微細狀

如菜葉居洞腸間多則為痔漏癰疽諸瘡無所不為九
曰虬蟲長一尺貫心則殺人又有尸蟲與人俱生狀如
犬馬尾或如薄筋依脾而居長三寸許大害於人然多
因臟寒勞熱而生

諸蟲入耳

蟲之類能入耳者不獨蜚蚰如壁虱螢火叩頭蟲皂角
蟲皆能為害有人患腦痛為蟲所食或教以挑葉為枕
一夕蟲自鼻出形如鷹嘴人莫識其名有人蜚蚰入耳

遇其極時以頭撞柱至血流不知云痒甚不可忍蜚蚰
入耳往往食髓至盡又能滋生凡蟲入耳用生油灌妙

遊齋
間覽

誤吞水蛭

吳少師在關外嘗得疾數月間肌肉消瘦每日飲食下
咽少時腹如萬蟲攢攻且痒且痛皆以為勞瘵也張銳
是時在成都吳遣驛騎招致銳到興元既切脉云明日
早且忍飢勿啖一物俟銳來為之計旦而天方劇暑白

請選一健卒趨往十里外取行路黃土一銀盃而令厨人旋治麪將午乃得食纔放筋取土適至於是溫酒一升投土攪其內出藥百粒進於吳飲之覺腸胃掣痛幾不能忍急登溷銳密使別坎一穴便掖吳以行須臾暴下如傾穢惡斗許有馬蝗千餘宛轉盤結其半已困死吳亦憊甚扶鰥竹榻上移時方食粥一器三日而平始信去年正以夏夜出師中塗渴躁命候兵持馬盃挹澗水甫入口似有物焉未暇吐之則徑入喉矣自此遂得

病銳曰蟲入人肝脾裏勢須滋生常日遇食時則聚丹田間吮啞精血飽則散處四肢苟惟知殺而不掃盡故無益也銳以是請公枵腹以誘之此蟲喜酒又久不得上味乘飢畢集故一藥能洗空之耳吳大喜厚賂以金帛送之歸

庚志

又

寧國衛承務者唯一子忽得疾羸瘦如削醫以為療疾治療無益醫劉大用問其致疾之因曰嘗以六月飲娼

家醉臥卓上醒渴求水不得前有菖蒲盆水清潔舉而飲之自是疾作劉默喜密遣僕掘田間淤泥以水沃濯取清汁兩盞置几上令隨意飲衛子素厭疾苦不以穢為嫌一飲而盡俄腸胃間攻轉攪刺久之始定續投以宣藥百粒隨即同泄下水蛭六十餘條便覺襟抱豁然劉曰此蓋盆中所誤吞也蛭入人腹藉膏血滋養蕃育種類每粘著五臟牢不可脫然久去汙渠思其所嗜非以此物致之不能集也然疋羸別以藥調補

類編

又

有人因醉薄暮渴飲道傍田水自此忽患胸腹脹滿遍
醫不效人亦莫識其病因幹宿客邸夜半思水飲令僕
覓之僕夜捫索見有缸數隻疑店主以此貯水遂取一
碗與其主飲便覺胸次豁然再索之忽覺臍脇急於店
反空地大瀉一二行平明視之所瀉乃水蛭無數繼看
夜來所飲缸水乃主人刈藍作靛者其病頓愈方思前
時渴飲田水不覺誤吞水蛭在腹遂成脹痛之疾乃蛭

為害今人耘田為此蟲所齧以靛塗之無不愈也

苦寸白蟲

趙子山字景高寓居邵武軍天王寺苦寸白蟲為撓醫者戒云是疾當止酒而以素所耽嗜欲罷不能一宿醉於外舍歸已夜半口乾咽燥倉卒無措飲適廊廡間有甕水月色下照瑩然可掬即酌而飲之其甘如飴連盡數酌乃就寢迨曉蟲出盈席覺心腹頓寬宿疾遂愈一家皆驚異驗其所由蓋寺僕曰織草履浸紅藤根水也

唐志

又

掘石榴東引根皮洗曝搗細不兼他味隔宿虛其腹凌晨溫酒調服妙

又

蔡定夫戡之子康積苦寸白為孽醫者使之碾檳榔細末取石榴東引根煎湯調服之先灸肥豬肉一大臠寘口中嚥咀其津膏而勿食云此蟲惟月三日以前頭向

上可用藥攻打餘日即頭向下縱有藥皆無益蟲聞肉
香啞啖之意故空羣爭赴之覺胸中如萬箭攢攻是其
候也然後飲前藥蔡悉如其戒不兩刻腹中雷鳴急登
廁蟲下如傾命僕以杖挑撥皆聯綿成串幾長數丈尚
蠕蠕能動舉而拋於溪流宿患頓愈姑廣其傳以濟後
人

庚志

誤吞蜈蚣

有村店婦人因用火簫吹火不知簫內有蜈蚣藏焉用

以吹火蜈蚣驚迸竄入喉中不覺下胸臆婦人求救人無措手適有人在傍云可討小豬一箇切斷喉取血令婦人頓吃之須臾以生油一口灌婦人遂惡心其蜈蚣滾在血中吐出繼以雄黃細研水調服之遂愈

蜈蚣及百蟲入耳

蜈蚣入耳取驢乳灌耳中當消成水百蟲入耳以桃葉火熨之卷而塞耳中立出

本
草

尸蟲

柳子厚罵尸蟲文云人有三尸蟲處之腹中伺隱微失
誤輒籍記日庚申幸其人之昏睡出讒於帝以求饗以
是人多謫過疾癘夭死而醫經亦云能與鬼靈相通常
接引外邪為害其發作之狀或沉沉默默不的知其所
苦而無處不惡或腹痛脹急或螺塊踊起或攣引腰脊
或精神雜錯變證多端其病大同而小異

雞岑方

酒蟲

齊州士曹席進鴉招所親張彬秀才為館舍彬嗜酒每

夜必寘酒數升於牀隅一夕忘設焉夜半大渴求之不可得恁悶呼躁俄頃嘔吐一物於地旦起視之見牀下塊肉如肝而黃上如蜂窠猶微動取酒沃之唧唧有聲始悟平生酒病根本亟投諸火中後遂不飲

丁志



醫說卷五